

Panas hingga hujung September

Putrajaya: Cuaca panas dan kering yang melanda negara buat masa ini dijangka berterusan sehingga penghujung September depan.

Menteri Sumber Asli dan Alam Sekitar Datuk Seri G Palanivel berkata, berdasarkan laporan oleh ASEAN Specialised Meteorological Centre (ASMC) yang berpusat di Singapura kelmarin, sebanyak 18 titik panas berjaya dikesan masing-masing tujuh di Sumatera, Indonesia, Kalimantan (11), Sabah (dua) dan Sarawak (empat).

Beliau berkata, semua titik panas yang dikesan dalam negara akan disiasat dan diambil tindakan pengukuasaan yang sewajarnya.

"Keadaan panas dan kering berpotensi menyebabkan jerebu dalam negara sekiranya berlaku pembakaran terbuka yang berleluasa dan tidak terkawal termasuk jerebu merentas sempadan dari negara jiran.



PALANIVEL

"Bagi menangani cuaca panas dan kering, setiap agensi yang terbabit dalam pengurusan bencana jerebu perlu mempertingkatkan usaha pencegahan ke atas aktiviti pembakaran terbuka yang berpotensi menyebabkan jerebu di peringkat tempatan," katanya dalam kenyataan dikeluarkan di sini semalam.

Katanya, kerajaan negeri, kerajaan tempatan dan pemilik tanah dinasihatkan memantau secara rapi kawasan yang mudah dan se-

ring terbakar seperti tapak pelupusan sampah, hutan, tanah gambut, ladang, kawasan pertanian dan industri.

Dalam pada itu, Menteri Kesihatan Datuk Seri Dr S Subramaniam berkata, bacaan Indeks Pencemar Udara (IPU) yang direkodkan pada jam 11 pagi semalam menunjukkan 15 kawasan mencatatkan status kualiti udara pada tahap baik dan 31 kawasan mencatatkan status kualiti udara pada tahap sederhana.

Menurutnya, status kualiti udara pada masa ini didapati sedikit merosot di beberapa kawasan seperti di Lembah Klang dan Nilai, Negeri Sembilan berikutan berlakunya kebakaran kecil di peringkat tempatan semasa cuaca panas dan kering.

"Bagaimanapun, kebakaran kecil ini sudah dapat dikawal oleh Jabatan Bomba dan Penyelamat dan pihak berkuasa tempatan (PBT) dari merebak," katanya.